



Pou Piblikasyon Imedya: 05/12/2023

GOUVÈNÈ KATHY HOCHUL

## GOUVÈNÈ HOCHUL ANONSE RE-OUVÈTI PON CARPENTER'S FLATS SOU RIVYÈ AUSABLE NAN KONTE CLINTON

*Gwo konstriksyon fini pou yon pwojè 6.2 milyon dola ki vize leve pon istorik ki sou State Route 9 pou diminye potansyèl inondasyon ak akimilasyon glas*

*Foto re-ouvèti pon an disponib [isit la](#)*

Gouvènè Kathy Hochul te anonse jodi a yon gwo konstriksyon fini pou yon pwojè reyabilitasyon 6.2 milyon dola ki te amelyore rezistans istorik Pon Carpenter's Flats sou State Route 9 nan Konte Clinton. Pwojè a, ki te kòmanse pandan ete a, pral ogmante pon ki gen estrikti an asye a twa pye edmi epi fè lòt amelyorasyon pou ede diminye enpak akimilasyon glas yo, diminye ka inondasyon ak amelyore sekirite nan koridò enpòtan sa a pou vwayajè North County yo. Route 9 Eta a konekte kominote yo sou rivaj Iwès Lake Champlain lan epi otomobilis yo itilize li pou yo rive nan Vil Plattsburgh, Eta Vermont, fwontyè Kanadyen ak lòt destinasyon populè nan rejyon an.

"Soti nan tanpèt lapli rekò ak inondasyon devastatè yo rive nan tanpèt nèj, Nouyòkè yo te déjà sibi konsekans chanjman klimatik yo epi n ap fè tout sa nou kapab pou asire ke enfrastrikti nou an pare pou fè fas a defi sa a", **Gouvènè Hochul te deklare.** "Lè nou leve pon enpòtan sa a sou bél Rivyè Ausable, n ap amelyore rezistans yon wout vwayaj enpòtan pou otomobilis North Country yo epi n ap pran yon mezi enpòtan nan batay nou kont enpak move tan yo".

Pon Carpenter's Flats la, ki te konstwi an 1941, nan lis Rejis Nasional Plas Istorik (National Register of Historic Places) yo epi yo konsidere li kòm yon ekselan egzanp enjeniri ak konstriksyon mwatyè 20yèm syèk la. Finisman pon 255 pye longè te ede fè Route 9 Eta a tounen yon gwo otowout nò-sid epi fasilité transpò atravè rejyon an.

Kòm yon pati nan pwojè a, estrikti an asye, ki te déjà reyabilite an 1994, te repare epi leve nan nouvo wotè li. Kounye a li chita sou blòk an beton yo te plase anlè estrikti anba tè ki egziste a pou satisfè nouvo elevasyon an. Anplis de sa, yo pral reyabilite arebò pon an, epi yo pral mete ray gid yo nan nivo estanda modèn yo.

Pandan konstriksyon an, yo pral devye sikilasyon alantou sit la lè yo sèvi avèk State Route 9 ak 9N, ansanm ak State Route 22 ak 422. Ajans Federal pou Jesyon Ijans (Federal Emergency Management Agency, FEMA) lan te finanse yon pati nan pwojè a anplis finansman eta a.

**Komisè Depatman Transpò Eta New York Ia, Marie Therese Dominguez, te deklare**, "Anboutejay glas yo vin tounen yon bagay ki twò komen nan Pon Carpenter's Flats, sa ki deranje vwayaj epi ki deranje rezidan yo ak vizitè yo. Men gras ak lidèchip ak vizyon Gouvènè Hochul, Eta New York ap fè envestisman enpòtan anpil pou amelyore rezistans enfrastrikti nou an kont enpak chanjman klimatik yo, jan nou te fè ak pon istorik sa a sou Rivyè Ausable".

**Senatè Eta Daniel Stec te deklare**, "Re-ouvèti Pon Carpenter's Flats se yon bon nouvèl pou rezidan Konte Clinton yo. Avèk pwojè reyabilitasyon an ki fini, pon ki te revize a pi byen ekipe pou li reponn a defi nou fè fas nan sezón fredi ak move tan. Sa pral siyifikativman amelyore aksè ak sekirite pou chofè nan rejyon nou an".

**Manm Asanble Billy Jones te deklare**, "Apre plizyè mwa nan ap tann, Pon Carpenter Flats nan Ausable te re-ouvre. Amelyore wout nou yo ak enfrastrikti nou yo tèlman enpòtan pou asire ke tout moun kapab kondui san danje, epi mwen vle remèsyé ekip konstriksyon an pou tout travay di yo. Mwen vle remèsyé tou tout moun pou pasyans yo pandan pwojè sa a paske mwen konnen detou a te deranjan epi li te afekte pwopriyetè biznis lokal yo".

**Sipèvizè Vil Peru a, Brandy McDonald, te deklare**, "Nou rekonesan dèské yo te kapab kenbe pwojè sa a sou bon wout la, epi nou kontan paske yo te re-ouvre pon an. DOT te kenbe yon bon komunikasyon avèk nou pandan tout pwojè a, epi nou apresye sa".

Nou ankouraje otomobilis yo anpil pou yo ralanti epi kondui nan yon fason responsab nan zòn travay yo. Kontravansyon yo double lè gen eksè vitès nan yon zòn travay. Kondanasyon pou de oswa plis vyolasyon eksè vitès nan yon zòn travay kapab lakòz yo revoke lisans chofè yon moun.

Pou jwenn dènye enfòmasyon sou sikilasyon yo, rele 511, vizite [www.511NY.org](http://www.511NY.org) oswa telechaje aplikasyon mobil gratis 511NY la.

Swiv DOT Eta New York sou Twitter: [@NYSDOT](https://twitter.com/NYSDOT) ak [@NYSDOTWatertown](https://twitter.com/NYSDOTWatertown). Jwenn nou sou Facebook nan [facebook.com/NYSDOT](https://facebook.com/NYSDOT).

###

Lòt nouvèl disponib sou sit [www.governor.ny.gov](http://www.governor.ny.gov)  
Eta New York | Chanm Egzekitif | [press.office@exec.ny.gov](mailto:press.office@exec.ny.gov) | 518.474.8418  
Enskri pou w jwenn mizajou Biwo Gouvènè a: [ny.gov/signup](http://ny.gov/signup) | Voye tèks NEW YORK bay 81336

[ANILE ENSKRIPSYON OU](#)